

**■ TRIBUNA POLITICA**

# Gia puspè la politica agricola

DA SILVA SEMADENI,  
CUSSEGLIERA NAZIUNALA

**P**ir gist avant in onn è vegnì acceptà cun passa 70% da las vuschs il project davart la «Segirezza alimentara». Dapi lura è fixads en la Constituziun federala, sper quels existents, anc novs princips per garantir il provediment da la populaziun cun victualias: La protecziun dal terren cultivabel, ina producziun agricola adattada a las cundiziuns localas, il diever da las resursas en moda effizienta, in'agricultura ed in'economia alimentara orientadas al martgà, relaziuns commercialas transcunfinalas duravlas, in diever spargnus da victualias. Tut quai sto vegnir realisà en ils proxims onns. La revisiun da la lescha d'agricultura, la politica agrara 2022, è instradada e procura gia oz per discussiuns animadas.

**E**d uss vegnan sutta-messas al pievel ils 24 da settember tant l'iniziativa orientada vers il passà per ina «Suveranità alimentara» sco er l'iniziativa populara verda cun il bel titel «Per victualias saunas sco er producidas en moda ecologica e fair». Tuttas duas na ma persvadan betg. En il cussegl naziunal avev'jau sustegnì cun pouca persvasiun l'iniziativa verda da «Fair Food». L'idea n'è betg



sbagliada. Tgi schon n'è betg per «Fair Food»? Tgi vul schon victualias e meda producziun sin donn e cust da l'ambient global ubain da povers a l'exteriur? Mo paucs – ed jau propi na. Jau dubit dentant che la realisaziun da l'iniziativa portia nus pli daspera a questa finamira. La messa en pratica n'è betg formulada clera en il text d'iniziativa. Ultra da quai prevesa la Constituziun dapi la davosa votaziun dal pievel gia «relaziuns commercialas transcunfinalas duravlas».

**S**ch'aliments importads ston accumplir las medemas pretendiuns sco products producids en Svizra, lura è necessarias cleras pretendiuns. Questas stuesan vegnir definidas concretamain dal parlament. Èn las pretendiuns autas pudess quai chaschunar dispitas cun partenaris da contracts da commerzi en l'entir mund. Èn las pre-

tensiuns dentant flaiavas pegiurass quai la qualità da la producziun indigena. En il mender cas sbassass la confederaziun las pretendiuns a l'intern per evitar mesiras da retorsiun. E quai n'è anc betg tut: I fiss necessari in apparat da controlla cumplitgà e custavivel per garantir ch'ils products importads accumpleschian las pretendiuns da qualità tenor lescha svizra.

**L'**agricultura svizra producescha a moda intensiva e n'è betg adina in bun exempel. Ils deficits ecologics èn gravants sco quai ch'il grond diever da pesticides u la sminuziun da la biodiversità mussan. Ella na cuntanscha nagina da las finamiras da l'ambient formuladas en il 2008. L'iniziativa «Fair Food» na midass deplorablain nagut vidlonder. In'agricultura svizra pli ecologica sco quai che la Constituziun pretenda gia oz vul ins cuntanscher cun la politica agrara 2022. Squisch fan duas autras iniziativaas popularas radicalas che vulan scumandar pesticides. Cun passa 60% manaschis agriculs bio è il Grischun en questas dumondas pionier en Svizra. Sin questa via stuain nus cuntinuar e resguardar er tar products importads sin ils labels da «Fair Trade» e da Bio.